



# BOSANSKOPETROVAČKI VJESNIK

## Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba

### Sastanak u Bihaću

Čelni ljudi Bihaća, Cazina, Bosanske Krupe, Bosanskog Petrovca Bužima i Ključa nezadovoljni su odnosom Vlade USK-a i premijera Huseina Rošića.

Gradonačelnici Bihaća i Cazina, Šuhret Fazlić i Nermin OGREŠEVIĆ, te načelnici općina Bosanski Petrovac, Ključ, Bosanska Krupa i Bužim, Zlatko HUJIĆ, Nedžad ZUKANOVIĆ, Armin HALITOVIĆ i Zikrija DURAKOVIĆ na današnjem Kolegiju gradonačelnika/načelnika održanom u Bihaću izrazili su nezadovoljstvo potezima i odnosom Vlade USK-a i premijera Huseina Rošića spram lokalnih zajednica.

Nakon održanog sastanka Šuhret Fazlić, gradonačelnik Bihaća, u ime danas prisutnih gradonačelnika/načelnika, istakao je nezadovoljstvo odnosom Vlade USK-a i premijera Huseina Rošića. On je kazao da je u posljednje vrijeme vidljivo da se potezi kantonalnih vlasti usmjeravaju protiv lokalnih zajednica i građana u kojima žive.

„Vidljivo je da se Vlada USK-a i premijer Rošić ponašaju kao predizborni štab stranke kojoj pripadaju, SDA stranke. Stoga smo se dogovorili da održavamo češće ove sastanke kako bi zaštitili lokalne zajednice na čijem čelu smo izabrani od građana,“ kazao je gradonačelnik Fazlić.

On je naglasio da Vlada USK-a povlači poteze koji negiraju ustavno-pravni položaj gradova i općina, zaobilaze gradonačelnike i načelnike, te provode aktivnosti mimo lokalnih zajednica.

„Mi nećemo dozvoliti da se krše ustavna prava lokalnih zajednica i bojimo se da će to svakim danom biti sve gore. Vlada USK-a treba da donosi odluke koje trebaju da olakšaju život u lokalnim zajednicama, no dešava se suprotno, donose se zakoni koji otežavaju rad lokalnih zajednica. Kantonalna vlada treba da se bavi zdravstvom, obrazovanjem i ostalim kantonalnim nadležnostima, no oni se bave pitanjima koja su u nadležnosti lokalnih zajednica, pri tom zaobilazeći gradonačelnike i načelnike. Nažalost vidljivo je da je počela predizborna kampanja i stoga očekujemo od Vlade i Skupštine USK-a da donose zakone i akte koje će olakšati rad lokalnih zajednica i život građana, a ne da sakupljaju političke poene“ - kazao je gradonačelnik Fazlić u ime danas prisutnih gradonačelnika/načelnika.



Načelnici gradova i opština USK

# Otvoreno pismo premijeru Rošiću

Postovani Premijeru!

Ovih dana je na svim Vašim portalima odjeknula vijest da ste za općinu Bosanski Petrovac, iz dobiti Unsko- sanskih šuma, odvojili oko stotinu hiljada konvertibilnih maraka, koliko je potrebno da se kupi donirana oprema- školski minibus, uzv aparat i bolničko vozilo, te da se asfaltira džamijski put u Rašinovcu. I to je za svaku pohvalu, od srca Vam se, usudiću se reći, u ime svih građana ove općine, zahvaljujem.

Međutim, želim Vam ukazati na jednu floskulu koju uporno izgovarate, a koju, nažalost ne prati ispravna matematička računica.

Naime, kažete da općina Bosanski Petrovac ima najveće iskoristivo šumsko prostranstvo jer učestvuje u ukupnoj sječi sa cca 40%, pa samim tim treba da dobije najviše sredstava iz dobiti Unsko- sanskih šuma. Ako znamo da je dobit ovog preduzeća iznosila dva i po miliona maraka, a općini Bosanski Petrovac se u predizbornom periodu najavljiavao iznos od debelih trista hiljada KM, koji je u postizbornom periodu naglo smršao na sto hiljada KM, kao profesoru Vam je valjda jasno da ni jedan od obećanih iznosa nisu srazmjerni ukupnoj dobiti.

Jednostavnom računicom je jasno da 40% od dva i po miliona iznosi jedan milion konvertibilnih maraka i da se u putu od provedbe presude Ustavnog suda FBiH kojom je dokazano kršenje prava naše lokalne zajednice u pogledu korištenja šumskih resursa do Vaših zijareta prilikom kojih nam dijelite naš novac po samo Vašoj stranci poznatim aršinima, izgubila jedna nula.

Prosječnom poznavatelju nadležnosti jasno je da su zdravstvo i školstvo pod Vašom ingerencijom. Pa Vas pitam, hoćete li od općine preuzeti obavezu finansiranja prevoza učenika? Ili podmirivanje računa za prevoz petrovačkih pacijenata do Sarajeva? Sve to, poštovani premijeru, od početka mog prvog mandata, finansira općina iz vlastitih sredstava.

Takođe, sredstva koja ste donirali ovim ustanovama vode se kao kantonalna sredstva koja, u bilo koje vrijeme, običnom odlukom, možete rasporediti u drugu općinu. Iako, ovaj put smo prilično sigurni da to nećete učiniti, jer bi onda bez posla ostao otac direktora Unsko- sanskih šuma, Harisa Mešića, koji je, bez konkursa, ekspresno zaposlen da vozi donirano sanitetno vozilo.

I za kraj, ljudski da Vam kažem da ne dolikuje jednom premijeru da dolazi u nezvanične posjete jednoj općini i da Vas, kako reče moj uvaženi kolega Halitović, vodaju „ko goluba na kanapu“. Pa, valjda se i za Bajram uđe prvo kod babe, pa tek se onda zijareti ostale rodbina. Vaši pokušaji podrivanja sistema i stvaranja paralelne vlasti u ovoj općini, na način da iskorištavate moj sukob sa Vama bliskim pojedincima i huškate Bošnjake protiv mene koristeći datume od nacionalnog značaja, su ispod svake časti. Prvenstveno jer je doba nacionalne retorike daleko iza Petrovčana.

Poštovani premijeru, za bolji život se broje pare, a ne krvna zrnca. Prema tome, od vas očekujemo da vratite našem narodu onu „nulu“ na iznos sredstava koja nam pripadaju. Sve osim toga je nastavak politike koja je vašu političku stranku dovela do toga da bude „pomnožena nulom“ u sedam od osam općina USK i krajnje je vrijeme da se takva politika promijeni i u Vašem i u našem interesu.

*Općinski načelnik Općine Bosanski Petrovac, Zlatko Hujčić*

## Druga tematska sjednica

Dana 13.9.2017. godine u Vijećnici Opštine Bosanski Petrovac održana je druga tematska sjednica Opštinskog vijeća.

Na samom početku vijećnik sa zamjenske liste političkog subjekta SDA, Jasmin Hamzić, je nakon svečane izjave i polaganja zakletve, pristupio tematskoj sjednici kao 17. vijećnik OV Bosanski Petrovac.

Vijećnici su, pored rasprave o samoj temi tematske sjednice, koja se odnosila na izvještavanje i analizu stanja u preduzeću „Komunalno“ Bosanski Petrovac sa prijedlogom mjera za sanaciju stanja preduzeća i donošenje Zaključaka za iznalaženje rješenja, zbog hitnosti, donijeli i Odluku o provođenju izbora za članove Savjeta mjesnih zajednica Bukovača, Vrtoče, Kolunić i Suvaja, a radi isteka mandata predsjedniku i članovima navedenih Savjeta.

Nakon dugotrajne rasprave vijećnici su donijeli Zaključak koji je objedino sve prijedloge koji se tiču finansijskog, organizacionog, kadrovskog i materijalnog stanja u „Komunalnom“ preduzeću.

Na kraju, podsjećamo da će se 10. redovna sjednica održati 20.9.2017. godine, sa početkom u 10 časova, a 11.redovna sjednica, 29.9.2017. godine u 14:00 časova.



*Vijećnici na sjednici vijeća*

## 10. redovna sjednica OV

Dana, 20.9.2017. godine, u Vijećnici Opštine Bosanski Petrovac, održana je 10. redovna sjednica Opštinskog vijeća.

Na samom početku vijećnici Klubova SDA, SBB i DF su zbog obilježavanja Dana spajanja V i VII korpusa napustili sjednicu.

Napravljena je i pauza u trajanju od sat vremena radi polaganja cvijeća na Trg šehida i mjesto spajanja V i VII korpusa, te je nakon toga zasjedanje sjednice Opštinskog vijeća nastavljeno, bez vijećnika koji su prethodno napustili sjednicu.

Nakon usvajanja dnevnog reda i Izvoda iz Zapisnika o radu sa IX, te vijećničkih pitanja i odgovora, nastupila je i realizacija tačaka dnevnog reda.

Nekoliko Odluka i Zaključaka koji su doneseni na prethodnim sjednicama, u nastavku rada vijeća stavljeni su van snage.

Nakon toga, jednoglasno je usvojen Izvještaj o radu Opštinskog pravobranilaštva Bosanski Petrovac, za period od

1.5.2016.-1.5.2017. godine, kao i Izvještaj o radu Organa uprave sa službama za upravu za 2016. godinu.

Usvojen je Plan i Program rada Opštinskog Načelnika i Organa uprave za 2017.godinu, broj:02/1-34-209-3 /17 od 09.03.2017.godine, Odluka o usvajanju godišnjeg obračuna Budžeta opštine za 2016. g. .

Primljene su k znanju Informacija o izvršenju budžeta opštine za period 01.01.-30.09.2016.godine i tekuće rezerve za period od 01.01. do 31.12.2016.godine, kao i Informacija o izvršenju budžeta i tekuće rezerve za period od 01.01. do 30.06.2017. godine.

Vijećnici su se upoznali sa pismom namjere „Pirnar“, te ga podržali, te su usvojili Odluku o proširenju poslovne zone „Gorinčani“, kao i Odluku o pristupanju Odluke o izmjeni i dopuni Regulacionog plana Poslovne zone „Gorinčani“.

Usvojena je i Odluka o načinu i uslovima raspolaganja nekretninama u vlasništvu Opštine Bosanski Petrovac (prodaja stanova), kao i Plan zimskog održavanja puteva 2017/2018. godinu.

Data je i saglasnost načelniku Opštine za potpisivanje aneksa Kolektivnog Ugovora o pravima i obavezama poslodavaca i radnika u oblasti komunalne privrede za teritoriju Opštine Bosanski Petrovac.

Vijećnici su dali saglasnost i za raspisivanje Javnog konkursa za Upravni i Nadzorni odbor JU „Centar za kulturu i obrazovanje“, kao i za direktora ove Ustanove, također je izmijenjen Pravilnik o radu, u kome je u sistematizaciji za radno mjesto direktora navedeno kao uslov 3 godine radnog iskustva.

Usvojen je Izvještaj o stanju lokalnih kategorisanih i nekategorisanih puteva na području opštine sa planom i sanacije istih, kao i Izvještaj o procjeni štete uzrokovane gradom.

Na kraju sjednice, Opštinsko vijeće je zajedno sa načelnikom Opštine donijelo Zaključak kojim saopštavaju da su upoznati sa nedoličnim ponašanjem grupe omladinaca koji su povodom obilježavanja 14. septembra, na lokalitetu Medeno Polje prema Bosanskom Petrovcu pjevali pjesme sa nedoličnim i uvredljivim sadržajem koji povređuje emocije drugog naroda, te da očekuju od nadležnih organa da hitno postupe u skladu sa Zakonom, po ovom pitanju.

## 11. redovna sjednica

Dana 29.9.2017. godine u Vijećnici Opštine Bosanski Petrovac, održana je 11. redovna sjednica Opštinskog vijeća.

Nakon utvrđivanja prisustva vijećnika, usvojen je dnevni red, kao i Izvod iz Zapisnika o radu OV sa druge Tematske i 10. redovne sjednice.

Potom su uslijedila vijećnička pitanja i odgovori.

Tačka koja se odnosila na izmjenu i dopunu Odluke o budžetu opštine za 2017. godinu povučena je sa dnevnog reda, kao i finansijski plan OIK-e za provođenje opštih izbora za 2018. godine, kao tačka o utvrđivanju opšteg interesa, radi izgradnje prostora smještaja mehanizacije i materijala, za JP „Komunalno“.

Pismo namjere, Arifagić Investmenta, koje je načelnik Hujić, pravilno primjenjujući zakon uputio na vijeće, razmatrano je od strane vijećnika, pa je potom donesen i zaključak u kome se navodi da su vijećnici upoznati sa pismom namjere, te da pozdravljaju svakog investitora koji ima namjeru da zapošljava i doprinosi razvoju naše Opštine.

Donesena je Odluka o utvrđivanju javnog interesa u svrhu legalizacije elektroenergetskog objekta NN mreža Vrtoče, kao i rekonstrukcija elektroenergetske mreže objekta NN mreža Hujici, mreža Novo naselje.

Nakon toga, donesena je i Odluka o kriterijumima, uslovima i postupku ostvarivanja prava na subvencioniranje najamnine za stan u stanovima namijenjenim za neprofitno-socijalno stanovanje.

Usvojena je Strategija razvoja Opštine 2011-2020, revidirana za period 2017-2020.

## Sastanak u Sarajevu

U Federalnom ministarstvu poljoprivrede, vodoprivrede i šumarstva u Sarajevu je dana, 15.09.2017. godine održan sastanak Projekt implementation teama Općine Bosanski Petrovac predvođen načelnikom Općine gđin. Zlatkom Hujicom, sa predstavnicima Jedinice za upravljanje WATSAN projektom na čelu sa gospođom Sukavatom Bejdić.

Sastanak je upriličen povodom nastavka projekta „VODOOPSKRBA I ODVODNJA OTPADNIH VODA U FEDERACIJI BOSNE I HERCEGOVINE“ u okviru kojeg Općina Bosanski Petrovac trenutno vrši tendersku proceduru oko izbora najpovoljnijeg ponuđača za izgradnju postrojenja za prečišćavanje otpadnih voda.

Načelnik Općine gđin Zlatko Hujic se tom prilikom zahvalio na pomoći koju Jedinica za upravljanje pruža Općini Bosanski Petrovac i izrazio nadu u dalju uspješnu saradnju.

Istoga dana, u prostorijama Sarajevske regionalne razvojne agencije „SERDA“, otvorene su ponude prijavljenih ponuđača na tender za Izvođenje radova na izgradnji vodovoda Bahići-Revenik, te je potpisan Ugovor sa najboljim Izvođačem.

Izgradnja vodovoda se realizuje u okviru Projekta razvoja ruralnog poslovanja, a mikroprojekat izgradnje obuhvata zemljane i montažerske radove na polaganju cijevi vodovoda.

Ovo je još jedan projekat koji garantuje i pokazuje težnju lokalne uprave Opštine Bosanski Petrovac za osiguranje boljeg života svih građana.



Na sastanku u Sarajevu

# Donacija R Srbije opštinama u BiH

Dana, 26.9.2017. godine, u Banja Luci je održan sastanak sa načelnicima gradova i opština Republike Srpske i Federacije BiH, kojima će biti realizovani projekti iz donacije Srbije u iznosu od 11 miliona KM, na kojem je prisustvovao i načelnik Opštine Bosanski Petrovac, Zlatko Hujčić.

Načelnike gradova i opština primili su predsjednik Republike Srpske, Milorad Dodik, predsjednica Vlade Srpske Željka Cvijanović i ministar finansija, Zoran Tegeltija.

Kada je riječ o raspodjeli sredstava opštinama u Federaciji BiH, Drvaru će pripasti 350.000 eura, Grahovu i Glamoču po 200.000 eura, Krupi 50.000 eura i našoj Opštini 100.000 eura.

Sa čelnim ljudima opština iz dva entiteta, koje su aplicirale sredstva, razgovarano je o procedurama na koji način bi moglo da se krene u realizaciju projekta, te je u okviru hodograma aktivnosti koji obuhvata 15 tačaka, prezentiran put od primanja sredstava na račun Vlade Srpske (koje je uplatila Vlada Republike Srbije), do realizacije projekata ciljnih opština, pa sve do dostavljanja izvještaja o upotrebi donatorskih sredstava.

Da bi se krenulo u realizaciju projekta prvi uslov je da bude obezbjeđena projektna dokumentacija.

Što se tiče naše Opštine, načelnik Zlatko Hujčić je istakao da će donirana sredstva usmjeriti u realizaciju dva infrastrukturna projekta, a to su: rekonstrukcija i sanacija vodozahvata vodovodne mreže MZ Vrtoče i elektrifikacija u MZ Kolunić, naselje Jakšić.

Također je izrazio nadu da će ova pomoć biti od velikog značaja kako za našu lokalnu zajednicu, tako i za ostale.



Na sastanku u Banja Luci

## ŠKOLSKE TORBE ZA PRVAČIĆE

Redovna nastava za osnovnu i srednju školu na području naše Opštine počela je 4. septembra. Prvog dana nastave učenici su uglavnom upoznati sa rasporedom sati i udžbenicima koje će koristiti tokom školske godine. Kako bi prvačićima poželjeli sretan početak nastave, i drag prvi susret sa školom, za njih je organizovana svečana priredba.

Ovom prilikom je govorila direktorica škole, Mujesira Kavaz, koja je istakla zadovoljstvo zbog dolaska mališana i zaželjela im uspješan početak nove etape u njihovim životima. Direktorica je uputila riječi zahvalnosti svima koji su potpomogli učenicima, da bolje prate i savladavaju školsko gradivo: Ministarstvu obrazovanja, nauke, kulture i sporta USK, koje je obezbijedilo komplet udžbenika svakom učeniku, a petrovačkoj Opštini, privrednicima i ostalim sponzorima, koji su potpomogli da svaki prvačić dobije školsku torbu sa priborom.

U ime lokalne uprave prvačiće je pozdravio načelnik Opštine Zlatko Hujčić i poželio im puno sreće i uspjeha u novoj školskoj godini.

“Želim da školu shvatite kao radost i početak jednog novog lijepog života, drugarstva i druženja, ali i poštovanja i uvažavanja prema vašim učiteljima i nastavnicima”, istakao je Hujčić.

Roditelji, nastavnici, djeca i svi prisutni uživali su u nastupima učenika drugog i trećeg razreda. Plesali su, recitovali, pjevali, poželjevši prvačićima mnogo lijepih trenutaka i mnogo dobrih ocjena, i da školu prihvate kao svoju drugu kuću. Ovdje se nauči čitati, pisati i računati, ali se i steknu prijateljstva, koja ponekad traju čitavog života.

U Osnovnu školu ove godine je upisano 43 učenika, otprilike, kao i prošle godine.



Nasmijana lica naših školaraca nakon podjele školskih torbi

## Obezbjeden prevoz za djecu s posebnim potrebama

Ove školske godine obezbjeden je prevoz djece sa posebnim potrebama do Bihaća.

U suradnji Načelnika Općine Zlatka Hujića i Centra za socijalni rad Bosanski Petrovac omogućena je posjeta djeci s posebnim potrebama Centru za razvoj inkluzivnih praksi u Bihaću. U ovom novootvorenom centru djeci i roditeljima bit će pružena stručna podrška iz oblasti logopedске terapije, fizioterapije, radne terapije, senzorne terapije, psiho-socijalne terapije sa najmodernijom opremom iz ove oblasti.

U projekat je uključen i Centar za socijalni rad i to ustupanjem vozača i vozila koje je obezbjedila vlada Japana, a Općina će finansirati trošak prevoza sa kombi vozilom obzirom da trenutno Centar za razvoj inkluzivnih praksi posjećuje 6 djece u pratnji sa asistentima ili roditeljima.



Vozilo ispred Osnovne škole, djeca, korisnici vozila

## Potpisani Ugovori sa 4 nova korisnika

Dana, 19.09.2017. godine, u maloj Sali Opštine Bosanski Petrovac, potpisan je Ugovor o re/konstrukciji stambenih jedinica u okviru Državnog projekta stambenog zbrinjavanja, između Federalnog ministarstva raseljenih osoba i izbjeglica, Ministarstva za ljudska prava i izbjeglice BiH, Opštine Bosanski Petrovac, i 4 korisnika: **Karanović Milanko, Pećanac Milan, Selimović Smajil i Vidljinović Milena.**

Ovaj Ugovor se zaključio u okviru realizacije pod-projekta BiH2, a korisnici su izabrani Javnim pozivom od 2014. godine.

Načelnik Zlatko Hujić, nakon što je čestitao korisnicima, istakao je da Opština neće stati sa rješavanjem stambenog pitanja lica koja su u stanju potrebe, jer je to ipak najvažniji segment, direktno vezan za život i osnovne ljudske potrebe.

Državni projekat stambenog zbrinjavanja izvršit će re/konstrukciju stambene jedinice po principu „ključ u ruke“, a Opština se obavezala da će pružiti pomoć korisniku i donatoru u cilju što bolje implementacije obnove stambene jedinice. „Ovo je dokaz progresivne stambene politike koju nastavlja opštinska administracija“, istakao je načelnik Hujić.

Na licima korisnika moglo se vidjeti zadovoljstvo, što su nakon tolikog perioda čekanja, konačno uspjeli, te su zahvalivši se načelniku Hujiću i predstavnicima ministarstva uputili i poziv na useljenje, po završetku radova na izgradnji njihove stambene jedinice.



Korisnici sa načelnikom Hujićem, predstavnicima Opštine i Ministarstva

## Obilježen 14. septembar

Dana, 14.9.2017. godine u Opštini Bosanski Petrovac je nizom aktivnosti obilježena 22. godina od oslobođenja.

U prisustvu brojnih građana, u večernjim satima je održan centralni dio manifestacije, dok je u jutarnjim časovima položeno cvijeće na više lokacija: kod Spomen kuće Skendera Kulenovića, u Rašinovcu, Bjelaju, Gorinčanima, kod Kadinjače, te kod mjesta spajanja V I VII korpusa.

Pred početak centralne svečanosti, građani, koji su se ovom prilikom okupili u velikom broju, dočekali su učesnike Marša mira "Putevima Petog korpusa".

Čestitku građanima povodom godišnjice oslobođenja, kao i svake godine, građanima je uputio general Atif Dudaković, a u ime Vlade USK, ministar za pitanje boraca i RVI Dževad Malkoč, kao i ostali gosti.

Obilježavanje Dana oslobođenja počelo je 11. septembra, a trajalo je do 20.9.2017. godine, kada se organizovalo niz aktivnosti, kao što je istorijski čas, kulturno-zabavni program, sve do završetka manifestacije u 18:00 h.



Polaganje cvijeća na spomeniku u Rašinovcu

## Obilježavanje Dana spajanja V i VII korpusa

Dana, 20.9.2017. godine, načelnik Zlatko Hujić, zamjenik predsjedavajuće OV, Muhamed Dračić, kao i saradnici iz Opštine Bosanski Petrovac, položili su cvijeće na Trgu šehida, povodom obilježavanja Dana spajanja V i VII korpusa.

Polaganje je upriličeno i na mjestu spajanja V i VII korpusa, gdje je cvijeće, u ime Opštine, položio savjetnik načelnika Hujica, dr Sanel Gredelj.

Pored ovih aktivnosti, održat će se i historijski čas, obraćanje gostiju, te kulturno-zabavni program.

Završetak manifestacije predviđen je u 18:00 časova.



*Polaganje cvijeća na Trgu šehida*

## Ustoličen mitropolit dabrobosanski Hrizostom

Novoizabrani mitropolit dabrobosanski Hrizostom svečano je dana 3.9.2017. godine, ustoličen i uveden u tron u Hramu Rođenja Presvete Bogorodice – Sabornoj crkvi u Sarajevu.

Ovom svečanom činu prethodila je Sveta arhijerejska liturgija, koju je služio patrijarh Irinej.

Nakon toga zvanicama i vjernicima besjedom se obratio Irinej, poslije čega je pročitana odluka Sabora Srpske pravoslavne crkve, da na tronu daborobosanskih mitropolita sjedi Hrizostom.

Patrijarh Irinej je poručio mitropolitu da ima veliku ulogu kao mitropolit dabrobosanski, koju su imali i njegovi prethodnici, a to je da širi ljubav među narodima.

Mitropolit Hrizostom je u svom obraćanju rekao da se nada da će da opravda dato mu povjerenje.

On je podsjetio da je Mitropolija dabrobosanska jedna od prvih i najstarijih eparhija koju je 1220. godine osnovao Sveti Sava i koja je kroz istoriju prolazila periode procvata, napretka, ali i kroz tragedije.

“Tražimo i apelujemo da krenemo sa programom obnove istine i pomirenja. Istina će nas i osloboditi svih naših trauma i pomiriti međusobno. Bog braćo i sestre svakom daje priliku i snagu da obnovi put ljubavi, poštovanja i zajedništva kroz program istine i pomirenja. Rekoh da obnovimo. Upravo tako da obnovimo ono po čemu je ova zemlja bila prepoznatljiva. Uklonimo sve, oslobodimo se svega onoga što nas čini robovima mržnje, zla i svakog nevaljalstva. Neka naša molitva

bude da ova naša zajednička zemlja bude zemlja ljubavi i dobrote, promijenimo sliku o svojoj zemlji”, poručio je mitropolit Hrizostom.

Svečanom činu je pored brojnih vjernika, predstavnika Islamske zajednice BiH, Jevrejske zajednice BiH, međunarodne zajednice, visokog predstavnika u BiH Valentina Incka, vjerskih poglavara, načelnika i gradonačelnika opština, prisustvovao i načelnik Opštine Bosanski Petrovac, Zlatko Hujić.

Hrizostom (svetovno Rajko Jević) rođen je 4.marta 1952. godine u selu Vođenici, kod Bosanskog Petrovca. Bogosloviju je završio u manastiru Krki, gdje se zamonašio 20. septembra 1971. godine, uzvši ime Hrizostom.



*Načelnik Hujić sa mitropolitom Hrizostomom*

## Ustoličenje novoizabranog episkopa Sergija

Njegovo preosveštenstvo novoizabrani episkop bihačko-petrovački Sergije svečano je ustoličen, dana 10. septembra 2017. godine, u Hramu Svetih apostola Petra i Pavla u Bosanskom Petrovcu.

Episkop Sergije je na ovom mjestu naslijedio vladiku Atanasija, izabranog za episkopa mileševskog.

Ovom svečanom činu prethodila je Sveta arhijerejska liturgija, koju je služio Njegovo visoko preosveštenstvo mitropolit zagrebačko-ljubljanski Porfirije, a bogoslužje je završeno pričešćem vjernika u hramu Svetih apostola Petra i Pavla.

Episkop bihačko-petrovački Sergije rekao je okupljenim vjernicima nakon ustoličenja da osjeća neizrecivu radost, jer dolazi kući, odnosno tamo gdje je počeo duhovno uzdizanje.

On je pozvao vjernike da se što više okupljaju u crkvi i da sveštena lica prepoznaju kao istinske uzore i one koji mogu da im pomognu.

Ovom događaju su prisustvovali načelnik Opštine Zlatko Hujčić i predsjedavajuća Opštinskog vijeća, Nikolina Simić.

A prisustvovali su i član predsjedništva BiH, Mladen Ivanić, ministar odbrane Srbije, Aleksandar Vulin, generalni sekretar predsjednika Srbije, Nikola Selaković, zamjenik predsjednika Odbora za dijasporu Miodrag Linta, ministar finansija Vlade RS, Zoran Tegeltija, gradonačelnik Banja Luke, Igor Radojčić, predstavnik Islamske, Katoličke i Jevrejske zajednice.

Episkop Sergije (Karanović), rođen je 4.jula 1975. godine u Bačkoj Palanci, od roditelja Petra i Mike, dobivši na krštenju ime Zoran.

Načelnik Hujčić se zahvalio na dosadašnjoj uspješnoj saradnji sa vladikom Atanasijem, i izrazio nastojanje i želju da i sa novoizabranim vladikom saradnja bude uspješna i konstruktivna.



Pozdravljanje episkopa Sergija i načelnika Hujčića

## Promocija rezultata u okviru PRO-Budućnosti

Promocija mirovnih aktivnosti mladih realiziranih u okviru USAID-ovog mirovnog projekta PRO-Budućnost, koja je okupila učesnike iz 35 lokalnih zajednica iz cijele Bosne i Hercegovine, održana je dana 7.9.2017. u Sarajevu.

Osnovni cilj programa bio je da podrži mlade da doprinesu procesima pomirenja i izgradnje mira u svojim zajednicama kroz razne aktivnosti.

Na konferenciji su predstavljeni rezultati postignuti kroz male grantove, koji su bili namijenjeni neformalnim grupama mladih iz zajednica u kojima djeluje navedeni projekat, na poljima unaprjeđenja infrastrukture, obrazovanja, kulture, sporta, medija, zaštite okoliša...

Direktor misije USAID-a u BiH Peter Duffy je rekao da su mladi jedan od najmanje iskorištenih resursa u BiH, a ujedno i njen najveći potencijal, a njihovo mobiliziranje za sudjelovanje u međuetničkim razmjenama, saradnji i društvenom aktivizmu, ključno je za pomirenje.

Kroz PRO-Budućnost je ukupno podržano preko 130 grantova, vrijednih oko 250.000 KM, od kojih je korist imalo 14.000 građana u 35 zajednica iz kojih su, osim mladih prisustvovali predstavnici opština i gradova u kojima su provedeni projekti.

Ovom događaju prisustvovala je i radna grupa iz naše Opštine, koja je u proteklom periodu radila na promociji mira i kreativnosti mladih, kao i Milica Latinović- predstavnica mladih naše Opštine, s obzirom da je nosilac jedinog realizovanog projekta u Bosanskom Petrovcu, u okviru PRO-Budućnosti, „Igraj košarku i budi sretan“.



Učesnici završne konferencije u Sarajevu

## Konferencija "Kultura sjećanja"

Njemačka fondacija Fredrich Ebert BiH je u saradnji sa Udruženjem građana "Oštra nula", 19. i 20. septembra u Banja Luci organizovala konferenciju pod nazivom "Kultura sjećanja", na kojoj je kao jedan od panelista učestvovao načelnik naše Opštine, Zlatko Hujčić.

Riječ je o konferenciji koja je ove godine posvećena propitivanju suočavanja s prošlošću u javnom, akademskom i medijskom diskursu.

Također, organizatorima je namjera bila pozabaviti se „Kulturom u kulturi sjećanja“, pa su u tom dijelu su glumci, muzičari, teatrolozi, režiseri, pokušali dati odgovor na tu vrstu suočavanja s prošlošću i doprinosu ovih oblasti pomirenju u regiji.

Konferencija je bila regionalnog karaktera. Pored panela u kojima su sudjelovali politolozi, novinari, predstavnici civilnog društva i lokalnih inicijativa, jedan panel je bio i Panel gradonačelnika-pogled u budućnost.

U tom dijelu prisutni su mogli čuti gradonačelnika Rijeke, Vojka Obersnela, Vukovara, Biljanu Gaćo, i Opštine Bosanski Petrovac, Zlatka Hujčića.

Težište njihovog izlaganja je bilo na budućnosti, kako graditi život na multietničkim vrijednostima i naučenim lekcijama iz prošlosti.

Tokom ovog dijela, panelisti su iznijeli primjere suočavanja s prošlošću u lokalnim zajednicama iz ugla gradonačelnika, u gradovima regije i njihovim načinima suočavanja sa službenim kulturama sjećanja, lokalnim inicijativama i istorijama lokalnih sredina.

Konferencija Fondacije Friedrich Ebert o Kulturi sjećanja redovno se organizuje od 2005. godine.



Načelnik Hujic kao panelist na Konferenciji "Kultura sjećanja"

## Izborna noć u njemačkoj ambasadi

Povodom parlamentarnih izbora u Njemačkoj, dana 24.9.2017. godine, njemačka ambasadorica, Christine Constanze Hohmann u Sarajevu je organizovala prijem za goste iz političkog, privrednog i kulturnog života BiH, na kojem je, po službenom pozivu prisustvovao i načelnik Opštine Bosanski Petrovac, Zlatko Hujic.

Na svečanosti su gosti Ambasade mogli pratiti kako se odvijaju izbori u Njemačkoj i saznati više o izbornom procesu.

Ambasadorica Njemačke poručila je da će Njemačka nastaviti da podržava Bosnu i Hercegovinu na njenom evropskom putu.

Podsjećamo da je ambasadorica Christine Hohmann bila u posjeti našoj Opštini u maju ove godine, kada je izrazila spremnost podrške Njemačke u razvoju naše lokalne zajednice, kao Opštine koja pruža velike mogućnosti za saradnju.

Njemačka izborna komisija potvrdila je da je Savez partija CDU/CSU Angele Merkel pobjednik parlamentarnih izbora sa osvojenih 33 procenata glasova, te je ovim rezultatom Merkelovoj otvoren put za četvrti mandat.



S lijeva : Dennis Gratz, Senad Šepić, njemačka ambasadorica i načelnik Zlatko Hujic

## INFO DAN u našoj Opštini

Dana, 21.9.2017. godine u Vijećnici je održano predavanje koje je bilo namijenjeno za nezaposlene poljoprivrednike u Opštini Bosanski Petrovac, a na kojem je predstavljen Program "Karta za zapošljavanje u poljoprivredi".

Riječ je o Programu koji obuhvata obuku, praktičnu nastavu i savjetodavnu podršku za ovu kategoriju, a cilj je da od svih učesnika bude izabrano 60 poljoprivrednika iz Drvara, Istočnog Drvara, Ribnika, Ključa, Petrovca-Drinić i naše Opštine, koji će ostvariti pravo na subvenciju u vrijednosti od 2.300 KM.

Navedenu subvenciju korisnici će moći koristiti za refundiranje troškova za: nabavku sjemenskog materijala, obradu zemljišta, osiguranje usjeva i doprinosa po osnovu zaposlenja.

Oko 40 učesnika juče je prisustvovalo ovoj obuci, te izrazilo interesovanje za ovu dobru priliku.

Pravo učešća imaju svi nezaposleni poljoprivrednici iz navedenih 6 opština koji će kroz projekat biti u mogućnosti da pokrenu proizvodnju lana ili drugih srodnih kultura, dobiju subvencije i registruju svoja gazdinstva.

Prijava za obuku se može izvršiti do 25. oktobra 2017. godine u Službi za obrt, poduzetništvo, razvoj i poljoprivredu naše Opštine.

Ova aktivnost je dio projekta Podrška lokalnim partnerstvima za zapošljavanje u Bosni i Hercegovini (LEP) kojeg finansira Evropska Unija sa 4 miliona eura, a provodi Međunarodna organizacija rada (ILO).



Info dan u našoj Opštini

## Obuka za omladinske koordinate iz naše Opštine

U periodu od 13. do 16. septembra u Neumu boravili su Omladinski koordinatori, imenovani nakon provedenog Javnog poziva ispred Opštine Bosanski Petrovac.

Namjena je da se podrže zagovaranja omladine, usmjeravanje pozitivne energije mladih ljudi u cilju doprinosa kvalitete života u opštini.

Omladinski koordinatori, Snežana Ćulibrk i Amila Bešić, će koordinirati aktivnosti Vijeća Evrope u našoj Opštini, a u okviru

programa Confidence Building Measures (CBM) Programme - "Strengthening position of Youth in Local Communities - divided municipalities in Bosnia and Herzegovina" (Izgradnja mjera povjerenja).

Prva aktivnost koja je okončana u okviru ovog programa jeste edukacija izabranih koordinatora.

Omladinski koordinatori su se osposobili sa potrebnim vještinama za organizaciju aktivnosti unutar svojih opština uključujući što veći broj mladih ljudi. Konsultantski proces, koji će biti vođen od strane Omladinskih koordinatora i uz podršku opština, u svakoj opštini bi trebao biti održan u toku oktobra i novembra.

Rezultati ovih aktivnosti, bit će diskutovani od strane svih opštinskih vlasti, Omladinskih koordinatora i Savjeta Evrope u decembru ove godine, u Sarajevu.

U programu učestvuje 19 opština iz cijele BiH.



Omladinski koordinatori iz 19 opština

## „EKOBIS 2017“

Privredna komora Unsko-sanskog kantona organizovala je 15. Međunarodni sajam ekologije, „EKOBIS 2017“, u Bijaču od 14. do 16. septembra 2017. godine, na kojem je učestvovala i Opština Bosanski Petrovac.

Naša Opština je uzela učešće zajedno sa opštinama Drvar, Istočni Drvar i Petrovac-Drinić, a u okviru promocije projekta „Razvoj plastične proizvodnje pokretanjem međuentitetske i međuopštinske saradnje“.

Ovaj projekat je podržan od strane Savjeta Evrope, a navedene opštine, među kojima je i naša, predstavljaju klaster 1, s tim da je naša Opština nosilac projekta.

Jedna od aktivnosti u projektu je i bilo učešće žena koje su dobile platenike kroz ovaj projekat, na sajmu „EKOBIS“.

Žene, korisnice platenika, na „EKOBIS-u“ su imale prilike promovirati i prodati proizvode koje su proizvele u platenicima i na poljoprivrednim imanjima.

Posjetitelji su mogli da vide i brošure o poslovnoj zoni „Gorinčani“ i o Čilimari, a najveći interes su pokazali za čilime, svjedoke stoljetne porodične tradicije ukasnog tkanja čuvenih „petrovačkih čilima“.

Štand naših opština su krasili upravo čilimi sa prepoznatljivim „Bolića kolom“, med i čajevi sa mednih i ljekovitih polja, domaća šljivovica, likeri od drenjina, džemovi, pekmezi, krastavci, raženo brašno i ostali proizvodi...

Opšti dojam korisnica je da je ovo bilo dobro iskustvo, te da su ostvarile brojne kontakte koje će dalje koristiti za plasman svojih proizvoda.

Podsjećamo da je sljedeća aktivnost na projektu učešće košnica na sajmu u Banja Luci, koji će se održati u novembru.

Izgled štanda na „EKOBIS“ –u



## “Dani base i krompira 2017”

Prepoznatljiva i popularna, time s nestrpljenjem očekivana, smoljanska tradicionalna manifestacija „Dani base i krompira“ održana je u ovom podgrmečkom selu 30. septembra, uz učešće velikog broja individualnih petrovačkih proizvođača dobrih sireva i jedrih krompira, među kojima posebno mjesto zauzimaju proizvođači base, autohtonog sira koji se proizvodi samo na našim prostorima.

Zahvaljujući dobroj, uistinu motivirajućoj organizaciji, ovogodišnji „Dani base i krompira“ – jedanaesti po redu – bili su posječeni i od strane drvarskih učesnika.

Skup je otvorio predsjednik MZ Smoljana, Marinko Mrđa. I ove godine, glavni pokrovitelj ove manifestacije je Opština Bosanski Petrovac

I organizatorima i izlagačima želja i cilj ogledaju se u nastojanju da se sačuva ovdašnji prirodni „brend“ – čuveni smoljanski krompir, i da se sačuvaju od zaborava, promovišu domaća kuhinja i seoski turizam.

Jedna od bitnih karakteristika ove gastronomske smotre jeste i domaćinska atmosfera među gostima, te običaj da se svi proizvodi izloženi na štandovima mogu kušati „do mile volje“.

U takmičarskom dijelu, stručni žiri je odlučio ko je najbolji od najboljih: prvo mjesto za najbolji sirac osvojila je Milka Mrđa,

za basu Stojka Dragišić, a za kajmak prvo mjesto je osvojila Dragana Marjanović! Priznanje za najveći krompir (990 gr.) pripalo je Sretku Kecmanu! Najljepši štand imali su Đuro i Kova Pećanac.

Prisutni su uživali i uz bogat kulturno-zabavni program, gdje su svoje umijeće u igri, muzici, i pjevanju pokazali: Amatersko kulturno-umjetničko društvo Mira Lukač iz Drvara, krajiška grupa “Drvosječe”, i sestre Aleksandra i Dejana Srdić.

„Dani base i krompira“ okončani su tradicionalnim seljačkim ručkom, kada su se na meniju, uz slavljeničke basu i krompir, našli smoljanska šljiva i kuhani kupus sa mesom – vjekovni domaći specijaliteti koji se takođe mogu „brendirati“!

Ima još jedna, zavičajna dimenzija „base i krompira“, zavičajni magnet jela koja su othranila hiljade i hiljade Smoljanaca, koje je život odveo od rodnog ognjišta: za „Dane base i krompira“ okupe se u svom zavičaju brojni Smoljanci, sa sve četiri strane svijeta, najviše iz Banje Luke, Beograda, Novog Sada i drugih dijelova Vojvodine...

I među izlagačima, dosta je bilo onih koji nisu iz naše Opštine, došli su iz Drvara i dr.



Izgled štanda na tradicionalnoj manifestaciji...

## Prva lutkarska predstava u našem gradu

Dana 9.9.2017. godine, u Domu kulture je sa početkom u 18:00 časova, u organizaciji neformalne grupe iz naše Opštine (Belma Gutlić, Jovana Budimir i Snežana Čulibrk) održana prva lutkarska predstava.

Projekat je podržan od strane Fondacije Mozaik, te je realizovan u svrhu podsticanja kreativnosti i njegovanja pravih vrijednosti, druženja, zabave i edukacije u ovom pogledu.

Predstavi su prethodile brojne radionice, na kojima je neformalna grupa sa djecom pravila lutke (likove), pisala i uvježbavala dramski tekst.

Cilj predstave je da roditelji odvoje svoje mališane od velikih ekrana, odvrata ih od ustaljenih šema svakodnevnice, te im omoguće razvijanje osjećaja ljubavi prema umjetnosti koja "čuči u ćošku".

U lutkarskoj predstavi pod nazivom "Grdana" smjestili su se svi likovi iz poznatih nam bajki, Crvenkapica, Trnoružica, Zlatokosa..., a sve u cilju konačne pobjede dobra nad zlom vješticom.

Na kraju, kao što to uvijek biva, to se i dogodi, zla vještica biva pobijeđena, u ovom slučaju postala je dobra kao i ostali likovi.

Mališani su tokom cijele predstave sa velikim interesovanjem pratili svaki pokret lutaka, a na kraju su imali mogućnost da u knjizi utisaka zapišu svoje osjećaje, kritike, kao i pohvale za predstavu.

"Vraćanjem kulture u kolosijek života svih nas oplemenjujemo suživot i međusobno ispreplitanje različitosti", poruka je, koju je neformalna grupa mladih organizatora uputila publici to veče u Domu kulture.



Scena za lutkarsku predstavu u Domu kulture



Brojni posjetioци sa velikim interesovanjem prate predstavu

## Bosanski Petrovac, 8.9.2017. godine - središte sporta i mladih

Kako je i najavljeno, 8.septembra je u Sali MSŠ „Bosanski Petrovac“, održan prvi Streetball- turnir u uličnoj košarci, koji su organizovali mladi iz naše Opštine.

Bosanski Petrovac je juče bio središte sporta i domaćin ekipama mladih ljudi koji su došli iz Novog Sada, Dervente, Laktaša, Banja Luke, Mrkonjić Grada, Drvara, Drinića, Bosanske Krupe i Cazina.

Turnir je trajao 9 sati, a od samog početka u dvorani je u svakom trenutku bilo preko 200 ljudi.

Organizatori, mladi ljudi koji su ovu ideju i realizovali su i više nego zadovoljni, prvenstveno jer su uspjeli na jedan dan sve mlade ljude iz naše Opštine okupiti u sportskoj dvorani.

Bilo je prijavljeno 15 ekipa, 3 ekipe u ženskoj konkurenciji, a 12 u muškoj, seniorskoj.

U seniorskoj konkurenciji prvo mjesto je osvojila ekipa „US Drinić“, iz Laktaša i Dervente, drugo mjesto- ekipa „Krupljani. ba“ iz Bosanske Krupe i Cazina, a treće mjesto ekipa „Caffe bar Moneta“ iz Drvara.

Kad je riječ o ženskoj konkurenciji, prvo mjesto su uzele djevojke iz Bosanskog Petrovca, ekipa „Unsko-sanske šume“, drugo mjesto- „Umine hurmice“ iz Bihaća, i treće mjesto- „Političari“ iz Bosanskog Petrovca.

Za seniorsku konkurenciju bio je obezbijeđen nagradni fond u iznosu od 2000 KM (prvo mjesto 1300 KM, drugo mjesto 400 KM, treće 300 KM), a za žensku konkurenciju, pehari i diplome.

Veliki je ovo uspjeh, kako za mlade koji su organizovali turnir, tako i za našu lokalnu zajednicu, koja je juče bila središte sporta i interesovanja.

Ime Bosanskog Petrovca spominjalo se mnogo puta, što mu vraća sliku mjesta u kojem postoje mladi ljudi željni pozitivnih promjena i aktivizma.

Mlade je, i ovog puta, podržala Opština Bosanski Petrovac: „Ako su mladi ljudi motivisani da svoju ideju pretvore u djelo, mi ćemo im uvijek pružiti podršku. To je ono što naša Opština uvijek praktikuje, i to je ono što ćemo nastaviti raditi. Ovi mladi ljudi su opravdali ukazano povjerenje“, istakao je načelnik Hujčić.



Turnir u košarci u našoj Opštini

Prizori, poslije rata (1992-1995.) :

..... Prije... ●●●●●



ŠIP "Oštrelj", Bosanski Petrovac



..... Poslije... ●●●●●

**Važni brojevi u Općini Bosanski Petrovac**

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

**Slušajte Radio Bosanski Petrovac od 15:00-17:00, svakim danom na 90.9 MHz fm**